



Fundasaun Mahein (FM), 28 Marsu 2018

Komunikadu Imprensa

Droga: Timor-Leste Hanesan Transit ba Nasaun Viziñu Sira

Mundu ohin loron krime organizadu transnasiona hanesan asuntu preokupante husi nasaun hotu-hotu ne'ebé afeta direta ba populasaun sira nia vida. Timor-Leste hanesan nasaun ida ne'ebé iha ameasa no risku ba krime organizadu transnasiona hanesan droga iha tinan hirak ikus ne'e no involve grupu comunidade oin-oin tantu sivil no pesoal autoridade seguransa sira.

Monitorizasaun Fundasaun Mahein (FM) konklui katak Timor-Leste hanesan nasaun transit ba droga no nia objetivu ka distinu ba nasaun viziñu sira liu-liu Indonézia. Nune'e kanal ka odamatan sira ne'ebé kritiku maka fronteira terrestre, aero portu no portu. Portantu grupu krime organizadu transnasiona sira haree katak kanal sira ne'e fasil liu tama-sai, tamba kontrolu husi autoridade seguransa sira sei fraku, menus ba ekipamentu no facilidade sira hodi kontrola no detekta.

Fronteira terrestre iha 2014 Senhor ida ne'ebé involve iha sindikatu Internasional droga nian lori tama droga ho tipu Sabu-sabu Kristal 1,595 Kg ho valor minimu \$ 478,500.00 ne'ebé tau subar iha mangeira Chuveiro nian no Polisia kaer iha Dili depois maka deskobre, ne'ebé maka iha 2015 Tribunal Dili kondena tinan 10 iha Prizaun. Razaun sindikatu ne'e hili tama husi fronteira tamba sistema kontrola iha ne'eba sei fraku.

Iha Aero Portu Internasional Prezidente Nicolau Lobato sidadaun Indonézia na'in rua ne'ebé Polisia kaer iha Aeroportu Prezidente Nicolau Lobato lori Sabu- sabu Kristal 1,192 Kg ho valor minimu \$ 356,100.00 ne'ebé maka ho distinu Denpasar – Indonezia. Felizmente Polisia kaer arguida na'in rua (2) ne'e hamutuk ho objetu krime no iha tinan 2015 Tribunal Dili kondena ho pena tinan 15 no tinan 13 fulan 6. Haree mos katak aviaun sira ne'ebé tranzit iha Singapura no pasajeiru sira ho distinu atu mai Timor-Leste ka país seluk iha Azia normalmente la hetan kontrolu maka'as iha Singapura. Nune'e, trafikante balun maka aproveira situasaun ne'e hodi mai Timor-Leste tamba sira mos hatene katak Timor-Leste nia sistema kontrolu mos sei kontinua nafatin frazil.

Husi Portu Dili ne'ebé sei fresku hela iha ita hotu nia hanoin ne'ebé Polisia prende kontentor sia iha loron 23 Janeiru 2018. Iha ne'ebé sasan ne'ebé kontein iha kontentor sia nia laran materia prima hodi produs PCC (*Paracetamol, Caffein and Corrosprodol*) hamutuk tonelada 162. Materia prima hirak ne'e nia distinu ba Indonézia. Suspeitu ba kazu ne'e sidadaun Timor-oan na'in ida no Indonézia na'in rua no submete ona ba primeiru interogatoriu iha Tribunal Distrital Dili no aplika Termu Identidade Rezidencia (TIR). Ironiku liu tan no halo ita hotu preokupa suspeitu ida hanesan sidadaun Indonézia halai sai ona husi teritoriu nasional. Mesmu kazu

ne'e sei iha hela prosesu investigasaun nia laran.

Rekomendasaun

Governu persiza tau atensaun maka'as hodi reforsa sistema kontrolu hanesan ekipamentus, rekursu umanu no seluk-seluk hodi evita kriminalidade organizada no transnasiona sira ne'e. Prinsipalmente oinsa maka bele tau-matan ba servisu integradu sira iha fronteira terrestre, Portu Dili no Aero Portu Internasional Prezidente Nicolau Lobato.

Atu hetan informasaun kle'an liu kona-bá asuntu ne'e bele kontaktu:

Nélson Belo

Diretor Ezekutivu

Email: direktor.mahein@gmail.com

Telemovel: (+670) 78316075 ka 77561184

Website: www.fundasaunmahein.org